



Minggu, 24 Januari 2021

Ogen: Jeremia 46:1-12



Kerina Radas



Sejarah bangsa-bangsa jadi persinget man kegeluhen bangsa Dibata. Renungenta enda nuriken maka Dibata berkuasa nandangi doni enda, la saja sejarah ras kegeluhen bangsa Israel si perdiateken tapi bangsa bangsa sideban pe idoni enda, Mesir, Babil, Asur, kerina lit i bas kuasa Dibata. Arah enda pe ipetangkas maka Jeremia, ipilih jadi selaku nabi la saja ngerna man kalak Juda tapi jadi nabi man bangsa-bangsa sideban. Rencana Dibata pe tangkas man bana, ituriken Dibata kai si jadi ras nandangi jadi. Situhuna, kai siilakoken Dibata e jadi kata persinget man Israel gelah ula kal ngandalken gegeh bangsa sideban alu nadingken Dibata. Erpekat ras gegeh bangsa sideban labo lit ertina, seakaten ngandalken dinging mindo perkuah ate Dibata. Paksa e Israel ersura-sura erbahan perjanjian alu mindo penampat man Mesir guna nampati ia.

Tangkas ituriken i jenda, Mesir italuken raja Nebukadnesar raja Babilon, kerina banci radas. Janah kai si jadi e enggo ikatakken Dibata man bangsaNa. Ertina kuasa Dibata si ngerana man bangsaNa lebihen asangken gegeh bangsa-bangsa sideban. La lit si banci pulah i bas kuasa Dibata nari. Alu bage la lit gunana erpekat ras bangsa sideban, ula kal darami gegeh si deban dinging ngandalken ia guna kegeluhen bangsa Dibata. Kata enda pe ndilo kita, mpersingeti kita anak-anak Dibata, si enggo ipilihNa ngenanami kerina si mehuli. Amin erbage-bage kiniseran man alankenta: persoalan ekonomi, pinakit, jabu ras sidebanna. Ula kal si darami gegeh ntah kuasa sideban guna nampati kita. I bas Dibata lit serpang pulang, la kurang keleng ate ras perkuah ateNa sibanci namapti kita. Andalken IA i bas kerina kecibal geluhta sabab IA me Dibata sierkuasa, la saja nandangi geluhta tapi kerinana si lit i doni enda. Kerina kuasa-kuasa kai pe, e kenetisik nge, la lit si kekal.



Kuasa ras keleng ate Dibata si la pernah radas, andalken e.